

# NEWSLETTER



FONDACIJA  
HASTOR

*januar*  
2021.



Nakon 10 dugih mjeseci, 15. januara su se studenti stipendisti Fondacije Hastor okupili na mjesečnom sastanku, koji je zbog pandemije COVID-19 održan putem online platforme. Direktor Fondacije Seid Fijuljanin, kao i uvijek, s osmijehom je dočekaio studente od kojih su neki prvi put prisustvovali ovakvom druženju te je s njima razgovarao o historiji, ideologiji i ciljevima Fondacije Hastor. Prisjetili smo se 2006. godine, kada su prvi volonteri Fondacije krenuli na put potrage za učenicima koji su usljed lošeg socio-ekonomskog statusa bili marginalizirani u društvu i time uskraćeni za mogućnost kvalitetnog školovanja i edukacije.

U nastojanju da malim, ali efektivnim koracima postavi čvrste temelje napretka mladih generacija, a time posljedično i bh. društva u cjelini, podršku Fondacije Hastor danas ima 2207 stipendista iz svih dijelova BiH. Činjenica da smo od početnih 304 stipendista i prve godine potpisivanja ugovora danas stigli do ove impresivne brojke nas zaista čini ponosnima. Nije se dešavao pad tih brojki ili stagnacija; u svakoj školskoj godini broj stipendista u Fondaciji Hastor je progresivno rastao.

# ODRŽAN ONLINE MJESEČNI SASTANAK STUDENATA

Međutim, ono po čemu je Fondacija specifična jeste da se svi oni, potpisivanjem ugovora, obavezuju da će koristiti svojoj zajednici sa zadovoljstvom, volontirajući u istima, pa se direktor posebno osvrnuo na volonterizam i njegov značaj. Direktorove riječi su stipendiste podstakle na razmišljanje o tome koliko su mjesečni sastanci s mlađim članovima Fondacije važni u formiranju njihovih ličnosti. Mentori im predstavljaju uzore, a tu zaista profitiraju i oni sami, jer osim što se trude promijeniti nečiji život nabolje, volontiranje mijenja i njihov.

Svjesni smo da situacija koja nas je zadesila nije olakšala obaveze mentora i mlađih stipendista. Štaviše, pred njih su stavljeni novi izazovi, ali, vjerujemo i nadamo se da ćemo svi iz ovoga izaći jači, iskusniji i kada se jednog dana vratimo „na staro“, biti svjesniji i više cijeniti istinske vrijednosti u životu, ali i svaki momenat u kojem nam je pružena prilika da utječemo na nekoga, bilo to kroz edukaciju, savjet i neki vid pomoći, ili čak samo lijepa, prijateljska riječ.

Pripremila: Nejla Komar





# TREĆE MJESTO ZA NEJLU KOMAR NA SAMNIUM TAKMIČENJU

Stipendisti Fondacije Hastor se svakodnevno susreću s mnogobrojnim izazovima, koji im nude priliku za iskazivanje vlastitih sposobnosti i mogućnosti. Izazovi se javljaju u vidu fakultetskih obaveza, vannastavnih aktivnosti, volonterskih aktivnosti s mlađim stipendistima, kao i volonterskih angažmana u lokalnim zajednicama. Često su upravo naši stipendisti inicijatori promjena pomjerajući vlastite granice i uvijek čineći korak više. O aktivnosti naših stipendista najbolje govore njihovi uspjesi s različitih takmičenja. U nastavku s ponosom predstavljamo našu stipendisticu Nejlju Komar, studenticu četvrte godine na Muzičkoj akademiji u Sarajevu, i njeno zasluženo treće mjesto na takmičenju Samnium.

U toku ljetnog perioda naša stipendistica se prijavila na audiciju za učešće u simfonijskom orkestru Samnium, koji djeluje u sklopu Samnium Univerziteta iz Beča. Upravo ovaj orkestar predstavlja jedan od najznačajnijih svjetskih centara umjetničke muzike. Međunarodni univerzitet za muziku Samnium je sastavni dio umjetničkog i obrazovnog programa International Orchestra Auditions Awards, a Samnium želi pripremiti umjetnike, bez dobnog ograničenja, koji dolaze iz cijelog svijeta za zvanje muzičara.

***Bilo je uzbudljivo iskustvo i definitivno vjetar u leđa za ponovni izlazak na ovo i slična takmičenja u budućnosti.***





Ovogodišnje međunarodno takmičenje je zbog cjelokupne situacije s pandemijom COVID-19 održano online. Žiri sastavljen od stručnjaka i nadarenih međunarodno poznatih majstora imao je priliku da odabere najbolje muzičare iz cijelog svijeta koji će biti dijelom orkestra Samnium, slijedeći program specifičnog obrazovanja koje uključuje druge univerzitet i umjetnička/muzička udruženja širom svijeta. Važan dio projekta predstavlja mogućnost da se umjetnički rad izrazi kroz predstave u najvažnijim evropskim teatrima, uključujući teatar Musikverein u Beču.

Naša stipendistica je u ovom takmičenju prepoznala svoju priliku, što je rezultiralo visokim trećim mjestom:

*“Odlučila sam pristupiti audiciji te sam početkom septembra saznala da sam prošla prvi krug takmičenja. No, tek nakon toga je uslijedilo pravo uzbuđenje i pripreme za finalni krug. Dostavljen nam je materijal koji smo trebali sami obraditi i spremiti te poslati u datom roku komisiji. Bilo je neobično i teže raditi to sve online, a ne uživo, jer muzika živi u momentu. Ipak, to je bio samo jedan od podsjetnika kako smo umjetnost u živom prostoru i vremenu ponekad možda uzimali zdravo za gotovo. Iako samo prvo i drugo mjesto podrazumijevaju odlazak u Beč i saradnju s Univerzitetom Samnium i njihovim orkestrom, ponosna sam da sam se u prvom dodiru s ovako značajnim takmičenjem, gdje je bilo preko 60 država učesnica, uspjela plasirati na treće mjesto.”*

Nejla je naša dugogodišnja stipendistica iz Sarajeva, gdje je stekla osnovno i srednje muzičko obrazovanje:

*“Iako se u mojoj porodici niko nije bavio muzikom profesionalno, umjetnički dar se prenosio dugo vremena, a ja sam imala sreće da krenem baš putem muzike. Moram priznati da sam u sebi oduvijek osjećala povezanost, podjednako prema muzici i prema medicinskim naukama. Kao malu mama me često vodila sa sobom na posao u bolnicu i pretpostavljam da se tu razvila ljubav prema medicini, na koju oduvijek gledam kao na jedan zaista uzvišeni i herojski poziv. Ipak, moj put izbora profesije i karijere je uvijek tekao spontano i prirodno ka svijetu umjetničke muzike. Kako su u Sarajevu Osnovna i Srednja muzička škola, ali i Muzička akademija u jednoj zgradi (samo na zasebnim spratovima), posebna me osjećanja vežu za nju. Tu sam i trenutno, studentica četvrte godine na Muzičkoj akademiji u Sarajevu, na Odsjeku za gudačke instrumente – smjer Violončelo.”*

Nejla je dosad imala priliku da učestvuje na mnogim domaćim i međunarodnim koncertima i projektima, kao što su otvaranje obnovljene sarajevske Vijećnice, Sarajevska zima, promocije knjiga, izložbe, a imala je čast i prirediti nekoliko humanitarnih koncerata u Mostaru i Sarajevu:





*“Kako sam oduvijek bila otvorena za međunarodnu saradnju, vrata su mi se otvarala i za razne projekte u inostranstvu. Nakon svakog od njih, vratila bih se u BiH bogatija za iskustvo, znanje i poznanstva koja su mi koristila za organizaciju projekata i festivala u našoj državi. Konačno, na trećoj godini studija, odlučila sam otići na dva semestra na Konzervatorij muzike u Vigu, Španiji. Tamo sam imala priliku biti dio filharmonija i orkestara kroz koje sam stekla iskustva potrebna za daljnje usavršavanje. Paralelno s tim, postala sam dio redakcije Fondacije Hastor. Zahvalna sam na tome, jer sam otkrila potpuno novu ljubav u sebi (ka pisanju), ali i stekla mnoštvo novih vještina. U našoj redakciji, djevojke zaista stoje jedna iza druge, i tu su se izrodila divna prijateljstva.”*

Stipendistica Fondacije Hastor je već treću godinu, gdje se ističe stalnom spremnošću za rad, kreativnošću i snalažljivošću u svim zadacima koji se nađu pred njom:

*“Otkad sam postala dijelom Fondacije, moja su se životna iskustva gradila na potpuno sigurnim i čvrstim temeljima. Kada znate da je neko uvijek iza vas na načine na koji Fondacija to jeste, nemate straha kročiti i rizikovati, izaći iz svoje komforne zone i time nizati uspjehe. Sve nas veže zajednička ideologija, moralni principi i uvjerenja, rad i disciplina koji nas grade i čine dostojnim i društveno odgovornim članovima naših zajednica. Zahvalna sam na vrijednostima koje su usadili u nas, ali i svakom momentu provedenom u kontekstu Fondacije – volonterskim sastancima, mjesečnim sastancima, i druženjima koja su se izrodila upravo iz istih. Biti dio ove porodice je zaista, posebna odgovornost i čast!”*

Pripremila: Maida Husnić



# PLAŠT SKROJEN OD POBJEDA



Odavno već, u okvirima ove rubrike, donosimo priče o mladim autorima, muzičarima, slikarima i sportistima koji hrabro i samopouzdanom koračaju ka svojim ciljevima. Ono što ih sve zajedno povezuje jeste ljubav prema onome što rade, ali i činjenica da su članovi Fondacije koja donosi, baštini i, već skoro 15 godina, ljubomorno čuva priče o njima. Ovoga puta će ove listove ispuniti inspirativna priča naše stipendistice Medine Baraković, učenice IX razreda Osnovne škole „Miričina“ koja je već u dvije godine, koliko je član Fondacije Hastor, pokazala kako odlučno nastoji ostvariti svoje zamisli te da se ne boji velikih ambicija. Medina već sada, kako kaže, mašta o tome da završi srednju elektrotehničku školu te istim putem nastavi i svoje akademsko obrazovanje. Ovoga puta o Medini govorimo kao o uspješnoj sportistkinji koja, trenirajući karate skoro deset godina, postiže zavidne rezultate te iza nje stoje brojna takmičenja koja su, neka manje, a neka više, značajno utjecala na njen dosadašnji uspjeh. Medina ističe kako je njena priča o karateu počela u njenom ranom djetinjstvu te da ljubav koja se tada rodila prema tom sportu nikada nije prestala.

*„Početak mog puta u sportu je bio veoma zanimljiv. Mama me na prvi trening karatea dovela kada sam imala 6 godina. Bilo je to davno, u januaru 2012. godine. To je jedna velika uspomena koje ću se uvijek sjećati. Od tada se rodila moja ljubav za sportom. Moje prvo takmičenje bilo je u Srebreniku gdje sam osvojila prvo mjesto i to je još više poguralo moju motivaciju i želju za karateom i uspjehom. Od tada nisam odustajala sve do danas. Bilo je mnogo uspona i padova, mnogo teških treninga, prolivenog znoja i odricanja, ali to sve me čini čovjekom i sportistom kakav sam sada. Karate je jedan predivan sport koji me ispunjava u svakom smislu, naučio me disciplini, samokontroli i poštovanju. Također, u tom sportu volim timski rad.“*

## NOVOSTI

*Posebno sam sretna što treniram u Karate klubu „Sensei“ Turija, klubu u kojem smo svi kao porodica, slavimo tuđe uspjehe kao svoje, treniramo dajući svoj maksimum.“*

Kako i sama ističe, još u djetinjstvu je našla put kojim želi hoditi i danas njime ide vrlo dosljedno i s velikim samopouzdanjem. Iza sebe ostavlja uspjehe koji, kako kaže, kad se na njih osvrne, vraćaju sjećanja na rano djetinjstvo za koje je sretna što je skoro na svaki mogući način povezano s njenom velikom ljubavi – karateom. Sjećanja su tu da u nama probude nostalgiju i vrate neke davne uspomene, ali njihov cilj je i da nas podsjetite kako ka budućnosti trebamo koračati što ambiciozniji kako bismo nastavili kreirati takva sjećanja da se jednog dana i na njih s ponosom osvrnemo. Iza Medine bez sumnje već sada ima mnogo takvih sjećanja i uspomena koje, kako ističe, planira graditi i u budućnosti. Jedno od najuspješnijih takmičenja je i nedavno ostalo iza nje.

*„Posljednje takmičenje bilo je u Tuzli 27. decembra 2020. godine. Sve je bilo u skla-*

*u s mjerama opreza zbog virusa COVID-19. Tu sam osvojila prvo mjesto u svojoj kategoriji borbe kadetkinje +54kg, također smo moja ekipa i ja, osvojile prvo mjesto u kadetkinjama ekipno.“*

Prije ovoga bilo je još nekoliko takmičenja koja su, kako Medina ističe, na nju ostavila poseban utisak, među njima su brojni uspjesi koje zaista vrijedi istaći, u njima se kroz godine oslikava trud jedne male djevojčice koja iz dana u dan raste, sazrijeva i postaje odlična sportistkinja. Medina je posebno izdvojila neke od njih:

2018. godine – Federalno prvenstvo za djecu 1. mjesto, Državno prvenstvo za djecu 3. mjesto

2019. godine – Federalno prvenstvo za djecu 2. mjesto i Državno prvenstvo za djecu 3. mjesto

2020. godine – Federalno prvenstvo za djecu 3. mjesto

Medina je i dva puta bila učesnica Balkanskog prvenstva za djecu, 2018. godine u Beogradu te 2019. godine u Banja Luci.

*...i uvijek  
podržavamo  
jedni druge!*





Uspjehe koje postiže prepoznala je i njena lokalna zajednica što predstavlja jednu od posebnijih nagrada i priznanja, a Medina je sa samo 12 godina izabrana za perspektivnog sportistu općine Lukavac. Njen uspjeh potvrđuje i slavni tehnički crni pojas na koji je, kaže, veoma ponosna. Sport je važan segment u životu mladih ljudi, to se primjećuje na Medininom, ali i primjeru brojnih drugih stipendista i stipendistica čije priče smo iščitavali na ovim redovima.

*„Po mom mišljenju sport je bitna karika u životu mladih, jer on nas uči kako da zdravije živimo i kako da budemo bolja verzija sebe.*

*On jača osobine u mladima kao što su upornost hrabrost i odgovornost, također, mladi uče kako da budu disciplinovani uz bavljenje sportom. Sport sklanja mlade s ulice i on im kroji put ka uspjehu.“*

Kako je naša Fondacija navikla biti dio samo dobrih i lijepih priča potvrđuje i Medina s plaštom uspjeha kojim se ogrnula i koji s ponosom nosi. Naravno, kako i sama kaže, Fondacija ima posebno mjesto u njenom životu i školovanju.

*„Mnogo sam sretna i zahvalna što sam dio ove velike porodice. Izuzetno volim volonterske sate koje provodim sa svojom mentorskom grupom. To mi mnogo znači. Mentori su zanimljivi, uspiju svaku temu kreativno obraditi. Na volonterskim sastancima sam do sada mnogo naučila, upoznala sam ostale stipendiste i stekla vrijedna prijateljstva. Moja poruka za ostale stipendiste je da nikada ne odustajete kada nešto postane teško, jer ako odustanete, nikada nećete znati šta bi bilo da ste bili uporni i istrajali u svojim ciljevima.“*

Pripremila: Almina Šabanović

*Moj klub je proglašen najuspješnijim klubom na takmičenju zbog čega sam bila veoma sretna, ali i ponosna.*







# PRICA O ŽELJI LJUBAVI I USPJEHU

Jednom davno je jedan mudrac kazao kako „ljudi postanu zaista nevjerovatni kada počnu misliti da mogu postići stvari. Kada vjeruju u sebe imaju prvu tajnu uspjeha“. Magičan je svijet koji nastaje u mislima onih koji strastveno žele ostvariti svoje želje i postići uspjehe, radeći ono što vole. Ljubav prema nečemu je najsnažnija sila koja podstiče snage za koje se često ni ne zna da postoje. Ljubav prema judou je i našu stipendisticu, Hanu Bandu, podstaknula da probudi u sebi snage koje postoje te da hrabro i s ljubavlju krene na svoj put naoružana samopouzdanjem. Hana pohađa VII razred Osnovne škole „Aneks“ u Sarajevu, i odlična je učenica. Svoju avanturu u okviru Fondacije Hastor započela je nedavno i ističe kako jedva čeka steći nova znanja i iskustva koja joj se nude. Svoje daljnje školovanje Hana planira nastaviti u Srednjoj medicinskoj školi, kaže kako joj je to oduvijek bila želja, jer nastoji pomoći ljudima i pružiti im ruku onda kada je to najpotrebnije.

Iako mnogo voli školu, Hanino srce je očigledno već odavno preuzeo sport kojim se aktivno bavi, u kojem uživa i koji joj donosi brojne titule, a jedna od njih je i titula federalne prvakinje. Čisti je primjer kako su za uspjeh potrebni ljubav, želja, malo truda i puno odricanja što i sama priznaje. S obzirom na to da već u osnovnoj školi njeni putevi intenzivno sjaje, Hanu u budućnosti zasigurno čeka jedno mjesto u svijetu velikih zvijezda sportista.

*„Svoje prve judo-korake napravila sam u januaru 2018. godine, u judo klubu „Nippon“, pod vodstvom trenerice Sabine Haračić. Prvobitno sam se počela rekreativno baviti ovim sportom, ali vrlo brzo je to preraslo u ljubav i ogromnu želju za uspjehom u ovoj disciplini. Pošto je trenerica prepoznala potencijal u meni, vrlo brzo sam krenula na brojna takmičenja na kojima sam bila vrlo uspješna i osvajala brojne medalje.“*

Hana, između ostalog, kaže i kako je morala pristati na brojna odricanja zarad uspjeha koje je postigla za ovako kratko vrijeme, ali ističe kako zbog toga ne žali i da nije propustila puno toga što bi se moglo mjeriti s ponosom koji osjeća. Misao koju smo istakli na samom početku ove divne i inspirativne priče možda i ponajbolje može objasniti kratko vrijeme u kojem je Hana postigla zavidne rezultate.





Ističe kako ju je kompas koji je pratila odveo na put o kojem je oduvijek maštala te kako je od malih nogu, gledajući druge kako treniraju, i sama maštala da jednog dana bude dio toga svijeta. Tada, kaže, nije mogla ni izmaštati da će s ovoliko ljubavi ići na treninge i baviti se ovim sportom.

*„Svim ovim dosadašnjim medaljama prethodili su brojni treninzi i dugotrajne pripreme koje su pored judo-treninga uključivali i svakodnevno trčanje u fitness centru i plivanje na Olimpijskom bazenu „Otoka“ pod vodstvom trenerice.*

*Smatram da je jako bitno da se mladi bave sportom, jer, pored važnosti za njihovo zdravlje, bavljenje sportom ima vrlo značajnu obrazovnu i odgojnu ulogu u njihovom životu.“*

Put uspjeha je gorak, ali su mu plodovi slatki. Hana kaže kako nije uvijek bilo lahko i da se znalo desiti da ponekad poželi biti kao i većina drugih njenih vršnjaka, no ističe kako u tim trenucima pomisli zbog čega je krenula na ovaj put. Njena želja da bude drugačija i da svoje slobodno vrijeme i tinejdžerske godine iskoristi maksimalno za ono u čemu istinski uživa i što voli dovoljno je snažna da svi njeni umori, kad pomisli na rezultate, postaju odmor i zadovoljstvo. Kao trijumf svojih takmičenja, Hana izdvaja Federalno prvenstvo 2019. te isto 2020. go-

dine na kojima je osvojila laskavo prvo mjesto. Prošle godine je sudjelovala na državnom prvenstvu gdje je postigla izuzetno značajan uspjeh, osvojivši drugo mjesto. Od ostalih takmičenja izdvaja „Lika open“ održan 2019. godine na kojem je, također, osvojila drugo mjesto te „Borsa open“ 2018. gdje je ponovo bila među prva tri najbolja sportista, osvojivši treće mjesto. Hana je svoj talenat i volju pokazala i na međunarodnim takmičenjima na kojima je osvojila ukupno 14 zlatnih, 10 srebrnih i 10 bronzanih medalja što bez sumnje može smatrati svojim velikim napretkom koji vodi u, kako smo već i rekli da vjerujemo, zvjezdanu budućnost.

*„Posebno sam ponosna na pehar sa Champion kupa 2019. godine za najuspješniju mlađu pionirku.*

*U budućnosti planiram postati državna prvakinja i želim osvajati balkanska odličja pa kasnije evropska i svjetska. Volontiram sa svojom mentorskom grupom i za mene Fondacija predstavlja podršku i motivaciju za dalji rad i uspjeh. Moja poruka za ostale stipendiste je da budu uporni i istrajni u svojim ciljevima te da će rezultati sigurno doći ako se budu trudili.“*

Hana zasigurno može biti uzor mladim ljudima te ih podstaći da vjeruju u svoje snove, jer ništa nije nemoguće ako naše djelovanje začinjimo ljubavlju, voljom i radom; taj recept zasigurno oduvijek uspijeva što smo kroz naše priče o stipendistima nebrojeno puta i pokazali.

Pripremila: Almina Šabanović



# Džana Vrabac

Stranice našeg newslettera redovno ispunjavamo pričama o uspjesima i pozitivnim poduhvatima naših stipendista. Osim obaveza koje izvršavaju u sklopu školskog ili akademskog obrazovanja, stipendisti Fondacije Hastor su aktivni u različitim humanitarnim udruženjima, nevladinim organizacijama, asocijacijama mladih, gdje proaktivno rade na unapređenju bosanskohercegovačke zajednice. Konzistentan rad i naponi koje stipendisti ulažu uvijek rezultiraju uspješno provedenim akcijama, projektima te brojnim radionicama. Ovog mjeseca se među takvima istakla Džana Vrabac te zaslužno nosi titulu stipendistice mjeseca.

Džana je rođena u Sarajevu, gdje je odličnim uspjehom završila osnovnu i srednju školu. Studentica je treće godine Fakulteta političkih nauka na odsjeku Socijalni rad. Predstavnik je BA studija u Naučno-nastavnom vijeću i članica Upravnog odbora Asocijacije studenata Fakulteta političkih nauka SPONA. U ovoj akademskoj godini je upisala još jedan fakultet – Pravni fakultet Univerziteta u Sarajevu.

*„Prve motive za rad i pružanje pomoći drugima stekla sam u savladavanju školskog gradiva ili prilikom pružanja pomoći pri obavljanju svakodnevnih aktivnosti. To se javilo i prije samog upisa u srednju školu, što je zasigurno utjecalo na opredjeljenje kada je u pitanju daljni put.“*

Srednjoškolsko obrazovanje je Džanu podstaklo da se trudi još više te je učestvovala na mnogim takmičenjima i ostvarivala zapažene rezultate. Početkom srednje škole aktivno je učestvovala u nevladinom sektoru i ističe da joj je angažman i volontiranje u različitim organizacijama ucrtalo put na kojem se danas nalazi.

Kroz volontiranje se susretala i s raznim komentarima koji nisu uvijek bili pozitivni. Međutim, njen najveći motiv su nasmijana lica djece s kojima se druži tokom volontiranja. Ovo ju je i potaklo da upiše Fakultet političkih nauka. Ona smatra da su je upravo želja i volja za pomaganjem drugima dovoljno motivisale i profilirale pri izboru studija.

Za postignuti uspjeh na fakultetu odlikovana je Plaketom za izvrsnost u znanju i Zlatnim novčićem Grada Sarajeva, dodijeljenog od strane gradonačelnika Abdulaha Skake. Ipak, svojim najvećim uspjehom Džana smatra pružanje pomoći drugima:

Tokom studija je veliku pažnju posvetila oblastima ljudskih prava, zaštiti i radu s djecom te analiziranju socijalnog položaja osoba s invaliditetom. To ju je podstaklo da napiše istraživački rad na temu „Položaj migrantkinja u toku migrantske krize u Bosni i Hercegovini“ u sklopu projekta „Trening za ženska ljudska prava i EU integracije“.



Navedeni projekat je organizirao Helsinški parlament građana. Njen rad je već objavljen i naišao je na ohrabrujuće i motivirajuće kritike od strane nastavnog osoblja i drugih zainteresiranih čitalaca koji su imali priliku čitati rad u online formatu. U okviru Global Analitike, centra za društvena istraživanja, Džana je objavila još jedan rad, na temu socijalnog položaja studenata s invaliditetom. Ističe kako suosjeća s ugroženim slojevima društva, pa je tako bila i jedan od inicijatora da se prikupi pomoć za migrante, koju je organizovala na Fakultetu političkih nauka u decembru 2019. godine. Većina njenih aktivnosti i angažiranja na polju volontiranja svodi se na rad s osobama ugroženim u mnogim aspektima života.

Jednu od prelomnih tačaka u njenom životu predstavlja dobijanje stipendije Fondacije Hastor:

*“Momenat u kojem sam postala dijelom velike porodice Fondacije Hastor predstavlja važnu prekretnicu u ovom dijelu mog života. Prije svega to kažem, jer sam tu upoznala mnogo ljudi, a svi su tako pozitivni i prijatni i dokazuju da ljudskost i toplina srca nisu nešto što nestaje i što će nestati. Fondacija mi je omogućila i ostvarenje još jedne od mojih želja, a to je upis još jednog fakulteta.”*

***Najveći uspjeh za mene je kada me neko od djece s kojom volontiram obraduje pokazavši da je naučio/la pisati, čitati, odabrati dobru, a ne lošu naviku i slično.***

No, ovdje se veličina, humanost i misija Fondacije prema stipendistima i društvu ne završava. Zahvaljujući Fondaciji, Džana je bila mentorica na edukativnim radionicama koje su održane u sklopu projekta „Vršnjačka podrška kao model edukacije i prevencije poroka savremenog svijeta“, a tema edukativnih radionica bila je „Prevencija poroka savremenog svijeta“. Zbog ozbiljnog pristupa ovoj temi, njenog značaja i suštine, radionice su održane kroz tri druženja u trajanju po dva sata. S obzirom na iskustvo koje je imala do sada, može kazati kako je ovo zaista prvi ozbiljan i sveobuhvatan pristup ovoj temi, čime se na kraju i ispunio cilj održavanja radionica. Kroz prvu radionicu postignut je doista zadovoljavajući nivo interakcije



i grupnog rada, a u ovom dijelu radionice je zaključila koji je početni nivo znanja učenika o porocima i ovisnosti. Kroz drugu radionicu fokus je više bio na porocima savremenog svijeta, njihovoj prevenciji i posljedicama. U toku druge i treće radionice neizostavan dio je bio posvećen isticanju vršnjačke podrške. Kroz različite priče, igre i zajedničke aktivnosti učesnici su zaključili da su oni ti vršnjaci koji će biti oslonac, podrška i ruka spasa svojim drugarima kada im je to potrebno. Ono što posebno vrijedi je činjenica da je postignut ključni cilj, a to je da oni kao manja grupa budu osviješteni o značaju vršnjaka i njihove podrške. Najvećim uspjehom ove radionice smatra interakciju koja je postignuta između nje i učenika, ali i njih samih te znanja koja su učenici usvojili i ponijeli s ovih radionica.

Pripremila: Nedžma Latić



*Zahvaljujući prilikama koje mi Fondacija Hastor pruža zaista mogu ostvariti sve svoje ciljeve, pa i one za koje sam smatrala da neću moći. Zahvaljujući njima nalazim se tu gdje jesam i sigurno nastavljam dalje uz njihovu nesebičnu pomoć i podršku!*



# ČETRNAEST PONOSA FONDACIJE HASTOR

*Najljepši moment za našu Fondaciju jesu oni kada shvatimo da je kraj jedne i početak nove godine. Tada rezimiramo uspjehe naših studenata, koji su svojim trudom, radom i nesebičnim zalaganjem u toku školovanja prikupili najvažnija priznanja. Ove godine vam s ponosom predstavljamo čak četrnaest studenata s izvanrednim uspjehom. Neki od njih okitili su se Zlatnom ili Srebreanom značkom, drugi Dekanovom ili nekom drugom nagradom.*

Maida je završila master studij na Fakultetu humanističkih nauka, Odsjek za bosanski jezik i književnost pri Univerzitetu „Džemal Bijedić“ u Mostaru i time stekla zvanje magistar bosanskog jezika i književnosti. Prosječna ocjena bila je 10.00, što je krunisalo njen studij Zlatnom plaketom Unije studenata Univerziteta „Džemal Bijedić“ u Mostaru. Maida je proglašena za najboljeg studenta Fakulteta humanističkih nauka. Naša Maida je i vrijedna članica redakcijskog tima.

*„Prepoznavanje uspjeha studenata uvijek predstavlja izuzetno značajnu motivaciju i podstrek za buduće korake. Jedan od presudnih faktora na putu ka uspjehu je dobro okruženje. Ja sam imala sreću da sam već nekoliko godina dio kolektiva Fondacije Hastor, koja mi je pružala sve-srdnu podršku i pomoć. Sve svoje uspjehe slavim zajedno s Fondacijom, nastojeći joj se odužiti za preneseno znanje, podršku, hrabrost i ljubav.*

*Zahvaljujući volontiranju s učenicima i mjesečnim sastancima studenata imala sam priliku upoznati brojne kolege iz cijele BiH, družiti se s njima, razmjenjivati mišljenja i ideje, razvijati vlastite vještine i sposobnosti kroz rad s djecom.*

*S druge strane, članstvo u redakcijskom timu mi je pružilo nezaboravno iskustvo, s obzirom na moju struku, ali i nezaboravno druženje s mojim kolegicama i kolegama.“*



*Maida Husnić*



## Adisa Bolić

Stipendistica Fondacije Hastor Adisa, porijeklom iz Bosanskog Petrovca, svoj dolazak u Sarajevo je obilježila na najbolji način. Završila je Prirodno-matematički fakultet, smjer Teorijska kompjuterska nauka, ostvarivši ukupnu prosječnu ocjenu 10.00. Zahvaljujući tome, Adisa je dobitnica Zlatne značke Univerziteta u Sarajevu.

*„Fondacija Hastor mi je dosta pomogla kroz školovanje i život općenito, jer stipendiju primam još od 5. razreda osnovne škole, naročito finansijski. Fondacija mi je omogućila odlazak na školovanje u Sarajevo, gdje sam imala bolje uslove za pripremu na matematička takmičenja, ali i razne školske i druge potrebe. Kroz aktivnosti Fondacije upoznala sam osobe s kojima sam i danas u dobrim odnosima, što smatram jako značajnim.“*

Ena je naša stipendistkinja koja dolazi iz Stoca, a završila je Fakultet strojarstva, računarstva i elektrotehnike na Sveučilištu u Mostaru. Prosječna ocjena koju je ostvarila na Studiju elektrotehnike, smjer Elektroenergetika, iznosi 5.00. Time je Ena okitila svoj studij Dekanovom nagradom i Zlatnom poveljom Sveučilišta u Mostaru.

*„Biti dio porodice poput Fondacije Hastor za mene predstavlja veliku čast. Činjenica da postoje članovi zajednice koji prepoznaju i istinski cijene trud uloženi kroz obrazovni proces donosi dodatnu motivaciju za mene kao studenticu. Ovim putem se želim zahvaliti Fondaciji, jer već dugi niz godina uspješno doprinosi stvaranju prosperitetnog društva stavljajući obrazovanje na prvo mjesto.“*

## Ena Bežo





# Igor Petković

Igor je završio Pravni fakultet u Sarajevu, gradu u kojem i živi. Prosječna ocjena tokom njegovog studija bila je 9.88. Ovakvo visoka prosječna ocjena se nagrađuje Zlatnom značkom Univerziteta u Sarajevu, koju je naš Igor i osvojio.

*„Zahvalan sam Fondaciji Hastor na pruženoj prilici da budem član porodice i usmjerim pažnju ka volontiranju i pomažanju zajednici.*

*Rad u Fondaciji je moj prvi ozbiljniji volonterski angažman. Načelima koje sam naučio ću se voditi cijeli život.“*



Zlatna značka Univerziteta u Sarajevu je otišla i u ruke našeg stipendiste Ajdina, koji dolazi iz Zenice. Svoje akademsko zvanje je stekao na Prirodno-matematičkom fakultetu Univerziteta u Sarajevu. Prosječna ocjena tokom studija na Odsjeku za matematiku, smjeru Teorijska kompjuterska nauka iznosila je 9.71.

*„Pored finansijske pomoći u vidu stipendije, značaj Fondacije je za mene i u prijateljstvima i mreži poznanstava koja stičem kroz volonterski angažman. Vjerujem da mi ovakav vid poznanstava može pomoći u budućnosti, ne samo u društvenim poduhvatima, nego i u mom profesionalnom životu.“*

# Ajdin Muharemović





## Ana Milijević

Ana je naša stipendistica koja je uspješno završila Akademiju likovnih umjetnosti, smjer Slikarstvo. Ana je ponosna vlasnica Zlatne značke Univerziteta u Sarajevu. Prosječna ocjena kojom je okončala studij je 9.56.

*„Smatram da sve što stvaramo, raste iz korijena svakodnevnice koju živimo, pa tako, osim godina truda, iza moje Zlatne značke stoji mnogo više. Prije dvije godine postala sam stipendistica Fondacije Hastor, koja me, osim značaja obrazovanja učila i nečemu ipak mnogo važnijem, a to je ljubav i požrtvovanost koju smo gajili novim prijateljstvima, mjesečnim sastancima te volonterskim satima. U današnje vrijeme popularna je riječ ‘virus’. Iskoristit ću ovu priliku da toj riječi za promjenu dam mnogo ljepše značenje, rekavši da smo u u Fondaciji Hastor, zbog svega navedenog u prethodnim redovima, dobili ‘virus dobročinstva’. Iskreno se nadam da je to jedini virus koji ćemo sa sobom nositi cijeli život i od kojeg se nećemo izliječiti nikada.“*

Kemil Bekteši, stipendista koji dolazi iz Sarajeva, završio je Akademiju likovnih umjetnosti na odsjeku Slikarstvo. Tokom studija, njegov prosjek je iznosio 9.54 te je time njegov studij krunisan Zlatnom značkom Univerziteta u Sarajevu.

*„Kao što sam i mnogo puta do sada spomenuo, Fondacija Hastor je zaista odlično mjesto za mlade i ambiciozne ljude. Smatram da je nama mladima od izuzetne važnosti biti okruženi ljudima koji su uvijek puni podrške. Fondacija Hastor, kao i njeni volonteri su uvijek nesebično pružali motivaciju, koja je svima nama potrebna, posebno u ovako čudnom periodu u kojem se trenutno nalazimo. Kada je riječ o važnim lekcijama, Fondacija me je naučila da se rad, trud i zalaganje uvijek isplate!“*

## Kemil Bekteši



# Alek Isaković

Alek je rođen u Sarajevu i završio je Muzičku akademiju Univerziteta u Sarajevu, na Odsjeku za dirigovanje, smjer Orkestarsko dirigovanje. Njegov studij je krunisan Zlatnom značkom Univerziteta u Sarajevu, jer je Alek tokom studija ostvario prosječnu ocjenu 9.53.

*„Smatram da naša Fondacija ohrabruje ljude koji imaju potrebu da se suprotstave negativnim aspektima društva današnjice i pokušavaju da se njihov glas čuje i nešto vrijedi, kako bi tim glasom mogli nešto promijeniti. Ovim putem moram reći da mi je bila zaista velika čast u januaru prošle godine postati dio jedne velike porodice Fondacije Hastor, jer zaista pruža opcije i mogućnosti svakog vida napretka, dakle, najmanje mislim na finansijsku podršku, iako im se i na tome mora odati jedno veliko priznanje, ali najviše na tome kako kroz svoja druženja (nažalost prekinuta uživo već mjesecima zbog epidemije) uči svoje stipendiste kako da postanu bolji ljudi u svojoj okolini i prema samima sebi.“*



Naša Amina dolazi iz Sarajeva i završila je Fakultet političkih nauka, Odsjek za komunikologiju. Amina je dobitnica dvostruke Srebrene značke Univerziteta u Sarajevu, za prvi i drugi ciklus studija. Kumulativni prosjek za prvi i drugi ciklus studija iznosio je 9.79. Amina je ovim prosjekom proglašena za najbolju magistricu Odsjeka za komunikologiju. Članica je Fondacije 13 godina. Svoje vještine u Fondaciji iskazala je kroz uredništvo u redakcijskom timu.

*„Imati Fondaciju Hastor kao jedan od temeljnih oslonaca u kompleksnom procesu obrazovanja, odrastanja i konsekvantno tome i same izgradnje ličnosti, uistinu je bila kako velika čast i privilegija, tako i ogromna odgovornost. Status stipendiste sam od samog početka percipirala kao status svojevrsnog ambasadora svih krucijalnih vrijednosti koje ona u okviru svog dugogodišnjeg progresivnog djelovanja promovira, njeguje, ali i prenosi na mlađe. Snažnu povezanost s Fondacijom opisala bih na sljedeći način: Fondacija i ja smo, kroz proteklih trinaest godina koliko sam njenim dijelom, rasle i napredovale zajedno. Prateći sva moja postignuća u domenu formalnog obrazovanja, od osnovnoškolske klupe, pa sve do fakultetske katedre, Fondacija je predstavljala jedan od najznačajnijih faktora moje velike ambicije i samokritičnosti, pa s tim u vezi i konačnog uspjeha na polju visokoškolskog obrazovanja.“*



# Amina Vatreš



# Almedina Numić



Almedina dolazi iz Ilijaša, a završila je Filozofski fakultet Univerziteta u Sarajevu, na Odsjeku za anglistiku. Prosjek nakon drugog ciklusa studija iznosio je 9.76, a naša Almedina se time okitila dvostrukom Srebrenom značkom Univerziteta u Sarajevu.

*„Mislim da je Fondacija Hastor jedna od rijetkih organizacija koja je i nakon toliko godina djelovanja ostala vjerna svojoj izvornoj misiji, viziji i ciljevima i da je upravo to ono što je čini posebnom. Bila mi je izuzetna čast zvati se stipendistom naše Fondacije i koračati zajedno s njom na putu promjene našeg društva ka boljem. Svoju zahvalnost za sve što sam naučila i stekla u Fondaciji je zaista teško iskazati kroz nekoliko rečenica te mi ne preostaje ništa drugo nego da tu zahvalnost iskažem svojim djelima i tako doprinesem djelovanju Fondacije i utjecaju koji ona ima na naše društvo. Ovaj uspjeh koji sam ostvarila je prvi korak ka tome. Fondaciji Hastor od srca želim još mnogo godina uspješnog, humanog rada i djelovanja!“*

Amar je stipendista koji dolazi iz Sarajeva, gdje je i završio Elektrotehnički fakultet, smjer Automatika i elektronika. Prosječna ocjena tokom studija za prvi i drugi ciklus iznosila je 9.38. Amar je dobitnik Srebrene značke Univerziteta u Sarajevu za prvi i drugi ciklus studija.

*„Fondacija Hastor, pored novčane podrške, pruža sjajnu mogućnost mladim osobama za lični napredak i obrazovanje. Kroz rad i djelovanje u Fondaciji Hastor je stvoren ambijent za otvaranje novih puteva vidika koji stipendisti koriste da kroz volonterski rad zajedno s uposlenicima Fondacije Hastor djeluju pozitivno na svoju lokalnu sredinu, a time i na svoju Bosnu i Hercegovinu. Za 4 akademske godine koliko sam bio stipendista Fondacije Hastor, unaprijedio sam svoje socijalne, volonterske i organizacione vještine, stekao prijatelje i poznanike, kao i vrijedno iskustvo koje će mi sigurno koristiti u budućnosti. Na tome sam veoma zahvalan Fondaciji Hastor.“*



# Amar Halilović



# Adnan Hatibović

Priznanje Srebrna značka Univerziteta u Sarajevu zasluženno je pripalo i našem stipendisti Adnanu, koji dolazi iz Sarajeva, a završio je Filozofski fakultet Univerziteta u Sarajevu, smjer Sociologija. Ukupan prosjek kojeg je ostvario tokom čitavog studija (I i II ciklus) iznosi 9.35.

*“Podrška i značaj Fondacije Hastor prvo se primijetila u finansijskom aspektu. Na taj način su uveliko olakšane svakodnevne aktivnosti i školovanje te je to doprinijelo rasterećenju porodičnog budžeta. Ipak, svoditi doprinose na spomenuto, znači svoditi proteklo vrijeme samo na jedan aspekt; isključivo fokusiranje na novčani doprinos znači zanemariti višedimenzionalnost ličnog razvoja koji sam doživio u Fondaciji. Rad s učenicima pomogao mi je u razvoju pedagoških sposobnosti, a volontiranje u administraciji pružilo mi je i nadogradilo znanja i sposobnosti kada su organizacioni aspekti rada u pitanju.*

*Dodatne aktivnosti u kojima sam učestvovao omogućile su provjeravanje vlastitih kompetencija i potencijala, podizanje samopouzdanja, stjecanje dodatnih poznanstava i različitih pozitivnih doživljaja. U konačnici, pruženo mi je razvijanje međuljudskih odnosa, omogućeno kvalitetno druženje i razvijanje vlastite društvenosti. U jednoj rečenici sročeno, moglo bi se reći da je Fondacija Hastor otvorila puteve ka dodatnoj (samo) nadgradnji, uočavanju vlastitih nedostataka, prevladavanju postojećih ograničenja i dodatnom upotpunjavanju ličnosti.”*





# Lamija Vrnjak

Lamija dolazi iz Sarajeva. Završila je Elektrotehnički fakultet Univerziteta u Sarajevu, smjer Računarstvo i informatika. Prosječna ocjena tokom studija iznosila je 9.16, a time je naša Lamija postala dobitnica Srebrene značke Univerziteta u Sarajevu.

*„Stipendista sam Fondacije Hastor od prve godine fakulteta. Kroz ove tri godine Fondacija mi je bila velika podrška, jer sam znala da uvijek imam nekoga kome se mogu obratiti. Pored toga, Fondacija se radovala mojim uspjesima i motivisala me da se usavršavam. Doista je poseban osjećaj kada se neko pored mojih najmilijih toliko zalaže za mene. Volontiranje je bilo lijek za moju dušu i način da se prizemljim i doprinesem svojoj zajednici. S ponosom kažem da sam član Fondacije i da mi je upravo ona bila velika pomoć na putu ka uspjehu.“*

Pripremila: Fatima Gazić

Lajla je stipendistica Fondacije koja dolazi iz Travnika, a završila je Fakultet političkih nauka Univerziteta u Sarajevu, smjer Politologija, usmjerenje Međunarodni odnosi i diplomatija. Prosječna ocjena tokom studija iznosila je 9.00 te je Lajla dobitnica Srebrene značke Univerziteta u Sarajevu.

*“Fondacija mi je dosad bila izniman oslonac u životu, posebno kroz moje školovanje, imajući na umu da i dalje studiram. Često se podsjetim koliko sam sretna što sam dio Fondacije, što sam baš ja izabrana da budem jedna od mnogih članova ove porodice. Također, činjenica da su članovi Fondacije izvrsni studenti, učenici, ljudi, daje mi vjetar u leđa i osmijeh na lice. Upoznala sam dosta dobrih ljudi putem Fondacije, otvorila sebi nova vrata koja možda inače ne bih mogla otvoriti. Uvijek ću biti zahvalna Fondaciji što je tu za mene i nadam se da uspijevam opravdati povjerenje.”*

# Lajla Leko





# STIPENDISTICI AMRI DEDIĆ URUČENA POVELJA DEKANA



*“Mnoge životne vrijednosti se nauče kroz volonterski rad u Fondaciji. Sa svim sigurno svi nauče koliko je važno doprinijeti svojoj zajednici, koliko je važno pomagati drugima, koliko smo zaista sposobni malim djelima učiniti veliku stvar. Ono što je za mene vrlo važno jeste to da sam naučila kako da učim, i to od svakog ponešto. Kroz rad s mladim ljudima trudila sam se od svakog ponijeti ono najljepše, ali i prenijeti im ono što smatram da je važno da nose dalje sa sobom. Naučila sam kako da slušam, a kada sam naučila kako slušati, onda sam uspijevala prepoznati ideju, vrijednost i talenat koji nosi svako od tih mladih ljudi.”*

Amra, pored velike zahvalnosti Fondaciji na pruženoj prilici i stečenom iskustvu, ističe:

*“Nakon završenog dodiplomskog studija počela sam raditi i uporedo upisala master studij opet na, za mene najboljem, Ekonomskom fakultetu u Zenici. Shvatila sam koliko je važno poznavanje jezika, pa sam se posvetila i usavršavanju engleskog, a to bih preporučila i svim mladim ljudima, jer tek sada shvatam koliko je neophodan. Svaki dan se trudim učiti nešto novo i korisno. Ipak, ne treba zaboraviti ono što smo naučili volontirajući u Fondaciji: znanje nije vrijedno ako ga ne podijelite s drugima!”*


Fondacija Hastor s ponosom čestita Amri na njenim uspjesima te joj želi mnogo sreće i još većih postignuća u budućnosti.

*Fondacija Hastor svake godine pridaje posebnu pažnju studentima stipendistima koji su svojim trudom, zalaganjem i uključivanjem u različite aktivnosti postigli izvanredne rezultate i time svoj rad okončali najvišim priznanjima. Naša stipendistica Amra Dedić dobitnica je Povelje dekana na Ekonomskom fakultetu u Zenici za ostvareni prosjek 10.00 na posljednoj godini prvog ciklusa studija. Ukupni prosjek koji je ostvarila tokom čitavog studija iznosi 9.70. Amra posebno ističe vrijednost volontiranja u Fondaciji, kazavši:*

Pripremila: Fatima Gazić

## RAM - RUBRIKA AKTIVNIH MLADIH

*RAM je, prema definiciji, radna memorija računara. U Bosni i Hercegovini, „radna memorija“ su upravo proaktivni i marljivi mladi ljudi koji su svojim djelovanjem primjer društva koje naša država treba. Kroz ovu rubriku predstaviti ćemo aktivne mlade stipendiste i stipendistice Fondacije Hastor koji, pored volontiranja, rade fenomenalne stvari i tako predstavljaju Fondaciju u najboljem svjetlu!*



## DŽEJLA ALIBAŠIĆ

Džejla Alibašić iz Sarajeva je studentica druge godine Ekonomskog fakulteta Univerziteta u Sarajevu i stipendistica je Fondacije Hastor još od drugog razreda srednje škole. Navodi da je veoma ponosna na činjenicu da je kroz petogodišnji volonterski rad u Fondaciji stekla priliku da pomaže onima kojima je ta pomoć najviše potrebna. Nakon završetka Srednje ekonomske škole odlučila je nastaviti usavršavati i širiti svoje znanje u

oblasti ekonomije te je iz tog razloga upisala Ekonomski fakultet.

Džejla svoj humanitarni rad naglašava kao volontersku aktivnost koja je odredila njen put ka činjenju dobra. Učestvovala je u mnogim humanitarnim akcijama i kaže da je pomaganje drugima ono što je ispunjava i čini sretnom. Voli da se osjeća djelom svoje zajednice i da joj aktivno doprinosi. Još kroz srednjoškolsko obrazovanje, učestvovala je



u druženjima i uljepšavanju dana starijim osobama u Gerontološkom centru u Sarajevu kao i u Centru za odgoj, obrazovanje i rehabilitaciju "Vladimir Nazor", gdje je dala sve od sebe kako bi toj djeci pokazala da nisu manje vrijedna te da imaju jednaka prava i sposobnosti kao i sva ostala djeca svijeta.

*„Sebe najčešće ističem svojim ambicijama i trudom kao i sposobnošću da uspješno uradim svaki zadatak koji mi je postavljen. Ponekad je malo truda potrebno da bi se učinilo puno dobra kojem svi težimo. Ja kao pojedinac ne mogu učiniti ništa, a ujedno mogu učiniti puno toga podsticanjem drugih da budemo suosjećajni i da se ne gubimo u vlastitim ciljevima kojima naravno trebamo težiti, ali ne zaboraviti da smo prije svega ljudi.“*

Aktivnost na koju je najponosnija je humanitarna akcija koja je realizirana nedavno, čiji je bila i organizator. U sklopu te akcije prikupljena su sredstva te napravljeno 70 novogodišnjih paketića koji su podijeljeni djeci iz socijalno ugroženih porodica.

*„Ponosna sam na to da sam pored učešća uspjela realizirati jednu sličnu aktivnost i smatram da je to samo početak mog rada.“*

Pored navedenih aktivnosti, izdvaja i humanitarni bazar na kojem je, u toku samo jednog dana, prikupljeno preko 11.000 KM prodajom artikala niskih cijena zatim prodajom karanfila po gradu za istu humanitarnu akciju kao i bazar. Svoj afinitet za slikanje usmjerila je, također, ka humanitarnom radu te naslikala mnogo slika za još jednu humanitarnu akciju te je sav prihod od prodaje slika bio prosljeđen spomenutoj akciji.

Naglašava važnost aktiviranja mladih u društvu veoma konkretno, ponovno ističući koliko je našeg malo potrebno da bismo za nekog učinili puno, a nečiji osmijeh na licu, pogotovo dječiji, uvijek mnogo znači.

***Vjerujte u sebe i u svoje sposobnosti, ispunjavajte svoje ciljeve, ali ne zaboravite da smo svi prije svega ljudi.***

Vjeruje da je veoma važno da mladi počnu da vjeruju u sebe i u svoje sposobnosti, da svojim malim doprinosom zajedno mijenjaju kako naše društvo i samu državu tako i svijet. Volontiranje u Fondaciji joj je mnogo pomoglo da izgradi sebe kao ličnost, ali i da stekne samopouzdanje i vjeru u sebe. Od prve godine fakulteta je od mentorstva pa preko monitoring tima došla i do tima administracije, dakle, za godinu dana je promijenila tri uloge, stekla različita iskustva i samo svojim radom i trudom dospjela tu gdje jeste. Ovo navodi i kao poruku svim mladim ljudima; niko ne može oduzeti njihovo znanje, trud i rad koji će uvijek biti vidljivi bez obzira na sve potencijalne prepreke koje nas mogu dočekati u procesu rada.

*„Hvala Fondaciji koja mi je omogućila da sagradim nova poznanstva, čak i prijateljstva. Pored mnogih vrijednosti koje nam je poklonila, dala nam je ono najvrednije – vjeru u sebe i vjeru u druge.“*





# "FAKE NEWS"

Ovaj mjesec vam pišemo o vrlo važnom pojmu kojeg morate biti svjesni i znati ga prepoznati – Fake news.

Lažne vijesti su vijesti, priče ili hoax (masovna obmana), stvorene kako bi namjerno dezinformirale ili zavarale čitatelje. Obično se lažne vijesti stvaraju kako bi se manipuliralo mišljenjem čitatelja, progurala neka politička agenda ili stvorila zabuna, a često i radi nekog vida profita (finansijske, političke dobiti i slično). Lažne vijesti zavarat će ljude, jer su plasirane na portalima koji izgledaju vjerodostojno ili koriste slična imena i domene kao vjerodostojni news-portali. One mogu sadržavati neke činjenice, ali njihova temeljna svrha nije prenošenje istine.

Kreatori lažnih vijesti zamagljuje granice između istine i laži te izvode priče iz realnih konteksta kako bi poremetili društveni diskurs zasnovan na činjenicama.

Sredinom 2016. godine, novinar Craig Silverman iz BuzzFeed-a primijetio je struju potpuno izmišljenih vijesti koje su potjecale iz malog grada u istočnoj Europi. Svi ti portali s lažnim vijestima bili su registrirani u istom gradu u Makedoniji – Velesu. Žurnalisti su počeli istraživati i kratko prije izbora u SAD-u, pronašli su oko 140 portala s lažnim vijestima koji su bili jako popularni na Facebook-u. Iako ovi mladi ljudi iz Velesa možda i nisu bili pretjerano zainteresirani za američku politiku, zarađivali su popriličnu svotu novca na Facebook-u. Predsjednički izbori u Americi (posebno sam Donald Trump) i dalje su vrlo popularna tema na društvenim mrežama.



KOJI SU TIPOVI  
LAŽNIH VIJESTI





## CLICKBAIT

Ovo su objave koje su izrađene kako bi privukle što više posjetitelja i podigle prihod od oglašavanja određenih web-stranica, a ujedno i najčešći oblik lažnih vijesti. Clickbait-objave koriste senzacionalističke naslove kako bi privukle pažnju čitatelja i generirale gomilu klikova na web, obično na štetu istine ili tačnosti. Clickbait ćete svakako prepoznati onog trenutka kada se već uvjerite da vas je neko obmanuo. No, to možete otkriti i ranije, postoji, naime, čitav niz znakova koji ukazuju da je naslov clickbait i prije nego što se na njega "upecate". Clickbait-naslovi se temelje na psihološkim trikovima koji su smišljeni da izazovu što veću radoznalost kod čitatelja/ki i privuku ih da kliknu na takav link. Jedna od najčešćih tehnika je direktno obraćanje čitateljima/kama, tj. pisanje naslova u drugom licu i stvaranje utiska da se neko obraća baš vama u trenutku čitanja. To su često direktni pozivi upućeni sa svrhom otvaranja linkovanog sadržaja, poput "Pogledajte zašto ovaj snimak osvaja internet", "Saznajte kako da (...)", "Nećete vjerovati šta se onda desilo", "Ono što je uslijedilo ostavit će vas bez daha" i slični. Na repertoaru clickbaita su nezaobilazni i "vrišteći" naslovi s izrazima poput "Šokantno", "Strašno", "Užas", "Ne-vjerovatno", "Skandalozno"... Kod svih takvih linkova možete biti prilično sigurni da ništa šokantno, pa ni iole zanimljivo, nećete saznati ukoliko ih otvorite.

## PROPAGANDA

Propaganda je namjerno, sustavni pokušaj oblikovanja percepcije, manipulacije spoznajama i direktnog ponašanja kako bi se postigao odgovor koji potiče željenu namjeru propagandiste. Naprimjer, često se susrećemo sa videosnimcima nećijih izjava koji su isječeni iz realnog konteksta i tako dobiju potpuno drugačiji smisao.

## SATIRA/PARODIJA

Popriličan broj stranica i profila na društvenim mrežama objavljuju lažne vijesti kako bi zabavile i nasmijale svoje čitatelje.

## TRALJAVO NOVINARSTVO

Ponekad novinari mogu objaviti priču, a da prije objave nisu provjerili sve činjenice, što na kraju može obmanuti čitatelje.

## PRISTRANE/ NAKLONJENE VIJESTI

Mnoge ljude privlače one vijesti koje potvrđuju njihova vlastita uvjerenja, a oni koji stvaraju lažne vijesti vrebaju nad ovim uvjerenjima. Društvene mreže prikazat će vam te vijesti i članke, jer vam prikazuju sadržaj baziran na vašim personaliziranim pretragama (fenomen poznat kao Filter Bubble, o kojem smo već pisali u prethodnim izdanjima našeg biltena).

Kao prijedlog za filmove koji će vas zasigurno natjerati da razmislite i shvatite da su internet i socijalne mreže pristrasne, ali i da sve što čitamo treba uzeti s dozom opreza navodimo dva vrlo interesantna dokumentarca:

- X THE SOCIAL DILEMMA
- X AFTER TRUTH: DISINFORMATION AND THE COST OF FAKE NEWS



*U 21. stoljeću nije dovoljno imati odličan uspjeh u obrazovnom procesu da bi se osoba učinila atraktivnom na međunarodnom nivou, nivou studija ili zaposlenja. Nerijetko se može vidjeti i čuti da su mladi ljudi, koji su skoro diplomirali ili magistrirali, nezaposleni, a da su se pri tome prijavljivali na nekoliko objavljenih konkursa.*

*Sve manje i manje mladih zna da pravilno koristi online resurse kojima raspolažu (npr. pravilno korištenje maila). Ova rubrika ima za cilj educirati mlade ljude o procesima apliciranja na različite edukacije, seminare, programe razmjena, ali i pokazati na koji to način studenti na međunarodnom nivou rade na vlastitom unapređenju.*

Ovog i narednog mjeseca ćemo vam objasnjavati kako napisati kvalitetan Curriculum Vitae, odnosno biografiju! U nastavku možete pročitati neke savjete koji će izdvojiti upravo vaše biografije u odnosu na biografije drugih aplikantata, ali i korisne upute koje će vam pomoći da na ispravan i koncizan način kažete mnogo o vama.

## UPOZNAJTE PUBLIKU!

Osoba koja će dobiti tvoj CV obično je zauzeta te je tvoja biografija samo još jedna na hrpi. Ta osoba, ovisno o radnom mjestu, jeste akademski građanin, profesionalac ili komercijalna publika, u svakom slučaju, osoba koja će pogledati mnogo biografija taj dan. Tvoj cilj je izdvojiti se iz mase originalnošću koja će rezultirati pozivom na intervju. Čitatelj želi već na prvi pogled biti u mogućnosti da brzo dobije informacije o tebi i obično će se fokusirati na stvari relevantne za kriterij kompanije. Da stvorite utisak potrebno je svega nekoliko, 10-30 sekundi, gledanja CV-a!

# ŽELIM NAPISATI DOBAR CV! (1. DIO)

Važno je da zapamtite da je ova osoba vaš prijatelj – oboje želite da dobijete posao! Kompanija želi dati posao najboljem kandidatu, a svako od vas želi biti najbolji kandidat za taj posao. Stoga, dajte im razlog da upravo vas odaberu!

## NEMOJTE SLATI ISTI CV SVAKOM POSLODAVCU!

Uprkos mišljenju da CV napišete "jednom", to ne biste trebali shvatiti doslovno i tako svakom poslodavcu poslati isti CV. Tačno je da biste svi trebali imati jedan sveobuhvatni CV u kojem stoje svi detalji o vama, ali to nije CV koji šaljete svima. Za svaki posao trebate prilagoditi biografiju tako da odgovara na



pitanje: *“Šta vi nudite od onoga što mi tražimo?”* Već je spomenuto kakva publika čita biografije. S obzirom na to da su oni ipak eksperti, vrlo brzo mogu primijetiti da niste izdvojili vrijeme da odgovorite na njihova pitanja nego da ste poslali upravo taj tzv. “univerzalni CV”. Zašto bi poslodavac vjerovao da ćete biti posvećeni poslu ako niste posvetili vrijeme za kreiranje CV-a koji odgovara kompaniji?

## MANJE JE VIŠE!

Zasigurno ste barem jednom čuli ovu izreku koja je izuzetno primjenjiva prilikom pisanja CV-a. Nemojte pisati predugačke CV-eve s mnogo teksta u kojem mnogo toga piše, ali je malo toga zaista rečeno.

Za apliciranje na prvi posao, CV ne bi trebao biti duži od 2 lista – 1 do 2 lista. Ukoliko već imate radnog iskustva, sve između 2 i 4 lista je prihvatljivo.

Obratite pažnju na to šta CV kaže o vama, da li sami sebi na prvi pogled izgledate kao obećavajući kandidat? Ukoliko je odgovor ne, potražite pomoć ili pitajte nekoga za iskreno mišljenje o tome kako mu/joj izgleda CV. Možda vaša biografija jeste kvalitetno napisana, ali ne daje utisak koji želite da ostavite na poslodavca.

## FORMAT JE VAŽAN!

Nemojte se zavarati da format vašeg CV-a nije važan. Ukoliko dostavljate kopije CV-a, pobrinite se da su kopije printane na vrlo kvalitetnom bijelom papiru. Ipak, prilikom online apliciranja, obratite pažnju na to da ne koristite neobične nijanse i kontraste boja kako se ne biste doveli u nezgodnu situaciju – svaki put kada napravite CV, zamislite kako on izgleda u crno-bijeloj varijanti. Zašto? Zato što će ekspert to isprintati u većini slučajeva upravo crno-bijelo, a ne u boji!

Fotografija može biti i benefit, ali i nedostatak, ovisno o kompaniji u koju aplicirate. Pozitivna strana fotografije jeste da će, ukoliko ste ostavili odličan utisak na razgovoru, baš vaš CV (nakon svih razgovora) vrlo lako pronaći! Međutim, fotografija također ostavlja prostora diskriminaciji, gdje bi neko mogao donijeti odluku pogubnu za vas zbog neke sitnice. Zbog toga je važno izabrati pristojnu, po mogućnosti profesionalnu, fotografiju koja će vas predstaviti u najboljem svjetlu. Ni slučajno ne treba koristiti fotografije s mnogo filtera kakve se mogu pronaći na brojnim društvenim mrežama.

## PROČITAJTE ONO ŠTO STE NAPISALI!

Jako je važno da detaljno pročitate CV koji ste napisali kako biste vidjeli da li se potkrala neka gramatička ili pravopisna greška. Vrlo često će poslodavci odbiti vaše prijave samo zato što se niste potrudili da provjerite ono što ste napisali.

Također, ovo može proizvesti i gori efekat ako ste, naprimjer, rekli da je neka od vaših kvaliteta tačnost, odgovornost, itd., gdje će se iz priloženog očito vidjeti da te kvalitete ne posjedujete. Ove greške zaista mogu biti vrlo “opasne” te je poželjno zamoliti i nekoga drugoga (ko nije imao dodira s vašom biografijom ranije) da pročita i ukaže na moguće greške.

*Ovo su neki opći savjeti na koje je važno obratiti pažnju prilikom kreiranja CV-a, a o tome kako strukturirati CV ćete moći pročitati više u narednom izdanju našeg biltena.*

ALEN MERAJIĆ



BERIN AGIĆ



AMINA  
SKOMORAC

AZRA SULEJTMANAGIĆ



ADISA  
BAJRAMOVIĆ



OBJEKTIV



MAHIR SALKANOVIĆ



ELMA KARIĆ



LAMIJA ČIČAK



HARIS MESINOVIC



ELMA ČOMOR



Samira Kurjaković



# *San jednog jutra*

*Noć blista u punom mjesecu,  
Zvijezde mu u sjaju orkestar čine  
Hrli noć da vidi svoju perjanicu  
Da dođe, da obasja tanke niti doline*

*Sve zvijezde od sreće trepere  
Čisti raj na nebu tmine  
Svaka svoju ljepotu bere  
Iz svake se odsjaj vine*

*Trčeći tako da povežu niti  
Da poklone miris zori  
Da se jutro umori diviti  
I da cijela vasiona hori*

*Susret ovaj pamti jutro  
Ono se iz sna tog budi  
Noć tada bježi žustro  
Jer, mjesec za snom žudi*

*Fatima Gazić*

FONDACIJA HASTOR

REDAKCIJA

GRAFIČKI DIZAJN


NASLOVNICA

Bulevar Meše Selimovića 16,  
Sarajevo  
033 774 789  
033 774 823  
fondacija@hastor.ba

Maida Husnić  
Almina Šabanović  
Una Karabeg  
Nejla Komar  
Emra Kulo  
Nedžma Latić  
Aleks Isaković  
Fatima Gazić

Ana Miljević  
Kemil Bekteši  
Belma Gutlić

Belma Gutlić, "Labud", ulje na platnu



FONDACIJA  
HASTOR